

Mozorro gaua

Udalak mozorroen argazki saioa antolatu du. Larunbatean mozorrotuta irteten direnek euren itxura betikotzeko aukera izango dute. Gauerdian hasi eta ordubetez Dioni Santoyo argazkilariak aterako ditu argazkiak, udaletxeko arkupeetan.

Erabili eta botatzen diren argazki kamera horietakoak erabili izan dira sarri parranda gauetan argazkiak ateratzeko. Tabernetan, jende eta zigarro arriskutsuen artean, egokiagoa izan da beti argazki kamera ona etxean uztea, badaezpada. Aurten, ordea, Lazkaoko Udalak mozorrotzen direnentzat argazki saioa antolatu du; gau horretako itxura betikotzeko aukera izango da, beraz.

Argazki estudioa arkupeetan

Larunbatean izango da argazki saioa; mozorrotzeko egunean, beraz. Gauerdian hasi eta ordubetez Dioni Santoyo lazkaotar argazkilariak aterako ditu argazkiak udaletxeko arkupeetan. Argazki dendetan egoten diren estudioen antzeko bat prestatuko du bertan: hondo beltz eta foku eta guzti. Ondoren, nahi duen guztiak izango du, taldeka nahiz banaka, bertan argazkia ateratzeko aukera.


Argazkiak erakusgai izango dira festak amaitu ondoren, Lazkaoko kultur etxeko erakusketa gelan. Nahi duenak, gainera, bere argazkia eskuratu ahal izango du. Nahiz eta oraindik erabat zehaztuta ez egon, seguruenik 250 pezeta ordaindu beharko da argazki bakoitzagarik. Nahikoa izango da erakusketara joan, zein argazki nahi den esan, eta helbidea ematea; gero etxera bidaliko dute.

Aurtengo berrikuntzak badu bere arrazoia. Orain arte mozorrotuen lehiaketa antolatu izan dute mozorroen egunean. Lehiaketa horretan, ordea, irabazlea aukeratzeko arazoak sortu izan dira, ez baitzegoen oso garbi puntuaketa nola



Argazki estudio antzeko bat prestatuko dute udaletxeko arkupeetan, nahi duenak bere argazkia ateratzeko

egin zitekeen. Ondorioz, argazki saioa antolatu dute, mozorrotzen direnak elkartzea baita helburua. Mozorrotuek, azken finean, elkar ikustea eta ondo pasatzea nahi izaten dute. Argazki saio honek helburu hori ziurtatzeaz gain, argazkia oroigarri gisa izateko aukera ere emango du.



GURUTZE HORTZ ZENTROA
Lazkaotar guztioi jai zoriontsuak opa dizkizuegu

Gurutze, 3 - 8. A • Tel./Faxa: 943 16 14 29 • 20210 LAZKAO (Gipuzkoa)